

1,000 pelajar sertai program Hari Keamanan Sedunia



Hampir 1,000 pelajar Universiti Malaysia Pahang (UMP) berbilang bangsa berkumpul di bandar Kuantan bagi menjayakan program UNESCO Sambutan Hari Keamanan Sedunia 2011 Peringkat Kebangsaan anjuran Pejabat Antarabangsa UMP dengan kerjasama Bahagian Dasar & Antarabangsa Kementerian Pengajian Tinggi Malaysia baru-baru ini.

Program ini menyaksikan beberapa kumpulan pelajar berbaju putih mempersembahkan pelbagai aksi tidak bergerak selama tujuh minit sebagai simbolik menghentikan keganasan dalam menyemarakkan semangat cintakan keamanan dunia sejangat.

Hadir menjayakan program, Ketua Pengarah Kementerian Pengajian Tinggi, Dato' Profesor Rujhan Mustaffa dan Naib Canselor UMP, Profesor Dato' Dr. Daing Nasir Ibrahim.

Menurut Dato' Profesor Rujhan, program ini dapat memupuk budaya sayangkan keamanan melalui rangkaian UNESCO seperti Kelab UNESCO, program di sekolah, institut dan badan bukan kerajaan.

"Saya sangat gembira apabila mengetahui bahawa UMP akan menubuhkan Kelab UNESCO UMP sendiri dan program hari ini adalah merupakan sebahagian daripada penganjurannya," katanya.

Beliau berkata, Pertubuhan Bangsa-Bangsa Bersatu (PBB) mendefinisikan budaya kedamaian ini mengandungi nilai-nilai, sikap, cara tingkah laku dan cara hidup yang menolak keganasan.

"Pencegahan konflik boleh diatasi dari akar umbinya melalui sesi dialog dan rundingan melibatkan individu, kumpulan dan negara. Pendidikan merupakan elemen utama dalam mencapai keamanan dunia.

"Gagasan 1Malaysia dan Agenda Transformasi Negara juga menggalakkan kasih sayang, toleransi dan sikap saling hormat-menghormati dalam kepelbagaian budaya. Malah, golongan belia merupakan agen bagi transformasi yang akan membawa perubahan sosial yang aman," katanya.

Menurut Profesor Dato' Dr. Daing, bersempena dengan Hari

Dunia UNESCO 2011 yang disambut setiap tahun pada 21 September, UMP berbangga atas usaha pelajarnya yang dapat berdiri bersama-sama dalam menyampaikan maksud keamanan, kasih sayang dan kewarganegaraan global.

Beliau berharap melalui usaha ini akan dapat mewujudkan kesedaran bahawa setiap insan berperanan dan perlu melibatkan diri dalam program sebegini.

Sementara itu, Pengarah Pejabat Antarabangsa, Dr. Wan Norlidah Al-Qadri berkata, penubuhan Kelab UNESCO ini akan memfokuskan kepada isu-isu dunia dan serantau. Ianya selari dengan Polisi Pengantarabangsaan UMP dalam aspek Program Pengantarabangsaan Global Isu-Isu Kumpulan.

Seorang peserta yang merupakan pelajar daripada Fakulti Kejuruteraan Awam & Sumber Alam, Iqram Zulkifli berkata, beliau yang pertama kali menyertai program UNESCO ini berbangga dapat menunjukkan apresiasi terhadap keamanan dunia.

